


# مکملہ ادبی و سیاسی رسالہ

❁ ادبی و سیاسی رسالہ اسبوعیہ در ❁

۳۰ نجی سنہ



۲۹ شعبان المعظم ۱۳۲۹

❁ پنجشنبہ ❁

جزو عدد : ۱۱۰

## فرانسه دور حاضر تاریخچه بر نظر

محوری : نیمیل فاگه

افاده مترجم :

بالاده کی عنوان ایله مجموعه مزه درجینی تنسب ایله یکمز مقاله ، فرانسه ارباب قلمندن موسیو ( نیمیل فاگه ) نك ، ( غولوا ) غزنه سی صاحب امتیازی موسیو ( آرتورمه بهر ) طرفندن ، فرانسه نك ۱۸۷۰ سنه سندن بزی گذران اولان وقایع تاریخچه سنه دائر اخیر انشر ایبدیلن ( کوزلرم نه کوردی ) نامنده کی خاطراته یازدیغی مقاله نك صورت مترجمه سیدر . ( غولوا ) غزنه سی معلوم اولدیغی اوزره فرانسه نك ( مونارشیت ) یعنی طرفدار حکمدار و محافظه کار جراثینك اك مهم و مفطرلرندن معدود در . صاحب امتیاز و مدیری موسیو ( آرتورمه بهر ) . . . کلنجه غزنه حیللده کی رسوخ و بهره سی ایله معروف اولان بو ذات ۱۸۷۱ دهری شکل جمهوریتی اکتساب ایدن فرانسه حکومتك ، حسب المسلک اك بیوك خلاف کیرانندن اوله رق ، بواعبار ایله فرانسه نك صوك قرق سنه لك امور سیاسیه سنی پك بقینندن تعقیب ایلش حتی بر جرق و قایعه . . . بالفعل اشتراك ایتش بولندیغی جهتله خاطراتی ، پك مختصر اولقله برابر ، فرانسه ده اهمیتله تاقی ایبدیلرک زیاده سیله مظهر رغبت اولمشدر .

شوراسی غریبدرکه ایوم فرانسه ده حکمدار طرفدارلنك و حتی محافظه کارلنك صور اظهاریه و علائم قارقه سنی قاتولیکلکه فرط مربوطیت و آنك نتیجه سی اوله رق تعصب دینی و یهودیلره افراط درجده خصومت تشکیل ایلدیکی حالده الحاله هذه حکمدار طرفدارلنی مسلک نك اك بیوك مروج و مدافع لرندن بولنان موسیو ( مه بهر ) عن اصل موسیویدر . حتی مسلکی اعتباریله اك بیوك بر موسوی دشمنی اولسی لازمکلان بو ذات صوك سنه لره قدر موسوی اوله رق قالمش و آنجق یدی ، سکنز سنه قدر مقدم فرانسه نك پك اصیل و قدیم عائله لرندن برینك قزینی تحت ازدواجنه آله ییلمك اینچون تبدیل مذهب ایله قاتولیک دیننی قبول ایلمشدر . کندیسی غزنه حیللکهده مهارتی مرتبه سنده صنعت تحریرده اقتداری و اسلوب بیاننده لطافت و متانتی ایله معروفدر .

موسیو ( نیمیل فاگه ) به کلنجه ، فرانسه زجه مطبوعات ایله آز چوق توغل ایدنلرک کافه سنه نامی مجهول بولنامسی اقتضا ایدن بوصاحب قلم ، فرانسه نك ایوم اك زیاده تعارف ایدن منقدیندندر . موسیو ( فاگه ) آقاده می اعضا سندن اوله رق اسلوبنده کی طور مخصوصی و اکثر انتقاد اتنده کی اصابت نظری ایله برابر پك مبذول اولان مطالعات و محاکات غریبه سی ایله ده شهرت شعارددر . بوصول سنه لره اك زیاده نظر دقت و استغرابی جلب ایدن مرنهی

ایسه تألیفاتك كثرتی و خصوصیه تنوعیدر. مثلاً یالکز یکن سنه دن بری همان هیچ برآی یکمه مشدرکه موسیو (مهبر فاگه) نك تاریخه، ترجمه حاله، مسائل اجتماعی، علمیه و سیاسیة حاضره و یاماضیه متعلق بر اثر جدیدی نشر ایدلش اولماسون. شهری، اسبوعی مختلف مجموعه لرده کثرته کوریلان مقالانی ایسه بومیانده داخل دکلدرد. بو مبذولیت و نشر یانك درجه سنی ازانه ایچون شونی سوبیله ملکه (فاگه) نك آفاده می ده کی رفقاسندن بری، ینه آفاده می اعضاسندن و منقدیندن بر دیگر ذانه «موسیو فاگه نك آثارینی نه به انتقادده بولنیورسکز؟» بولنده بر سؤال ابراد ایتش، منتقدده «نصل انتقاد ایدیم؟ بو غریب آدمه یتشمک قابل دکل. بر اثرینی اوقومغه وقت بولمده دن دیگرینی نشر ایدیور» جوابی ویرمشدر. ایشه یالکز شو مجاوبه موسیو فاگه نك قوه تحریریه و تألیفیه سی حقنده بر فکر ویرمه کفایت ایلر ظن ایدرز.

موسیو فاگه نك مسلک سیاسیسنه کلنجه، کندبسی جمهوریت طرفدارلرندن و تعبیر جائز ایسه بزده مساسنه اویمیان معناسیله قاریشدرلماق شرطیله، معتدل حریتپروراندیدر. یعنی اساساً موسیو (مهبر) ك فکر و مسلک متخذینه ضد برمسلك صاحبی در. بو اختلاف فکر و مسلک ره نمأ موسیو (مهبر) طرفندن نشر ایدیلن خاطرانه مقدمه یازمش اولسنه کلنجه، اول امرده موسیو (مهبر) ك فکر اختلافی صرف سیاسیاته حصر ایدره ك آنك خارجنده، مجبول بولندیفی نزاهت اطوار و احوالی، معاملات خاطر نوازانه سی ایله یارسك محافل ادبیه و کبارانه سنده بلا تفریق فکر و مسلک کندبسی یك چوق کیمسه به سودیره ك مرعی الحاضر اولسندن و ایکنجهی درجه ده ده خاطرات مذکور نك تاریخ نقطه نظرندن جداً حائر قیمت و اهمیت بولنسنندرد.

بو مقدمه د، موسیو (فاگه)، غولوا صاحبك سلسله خاطرانی تعقیب ایله فرانسه حکومتك ۱۸۷۱ دن، یعنی محاربه فی متعاقب جمهوریت ایله داخل اولدیفی دور حاضر دن اعتباراً یکچریدیکی صفحات سیاسینه نك، وقوعات مختلفه نك، داخلآ تحدث ابدن مشکلاتك، بولانیزم، دره بفوس مسئله نری کی قاریشق حادثاتك کافه سنی حاده تدقیقدن یکیرمش و بوندیقاتی معنادی وجهله برطاقم نوشیده مطالعات و محاکات ایله توشیح ایدره ك فرانسه جمهوریت حاضره سنك مختصر و فقط جداً مفید بر تاریخچه سنی وجوده کتیرمشدر. بوناریخچه بر از دقت و محاکه ایله نظر مطالعه دن یکیر یله جك اولورسه، فرانسه نك شوقرق سنه لك دوره تاریخچه سنده سوزك آیاغه دوشه سندن و خصوصیه بر سوری کرسنه چشمانك امور اداره به مسلط اولمرندن طولانی متوالیاً مروض قالدیفی مشکلات و حادثات مشوشه ایله، اوچ سنه دن بری مملکت مزده بعض کیمسه لرک، ترقیپرورلک نامیله ودها طوغریسی خفتپرورلک اثری اوله رق متصدی اولدق لری اجرات بوزندن الیوم ایچنده بولندیغمز کشمکش احوال آرده سنده غریب و خصوصیه جد آخن وفتور آور مشاهرتلر بولندیفی کور یله جکندن مقدمه مذکور نك، فقط تاریخچه عائد اقسامنی بالترجه اصحاب مطالعه نك معرض انتباه و اعتبارنه وضعه لزوم کوردك. شوقدر وارکه مقدمه اوله رق یازیلان بر مقاله ده بالطبع التزام ایجاز ایجاب

ایلدیکندن ( فاگه ) ، فرانسه ده ۱۸۷۱ دئبری سرزده ظهور اولان وقوعاتک تفصیله کیریشیمه رک یالکز او وقوعاتک لدنیاتی یعنی مستور و مجهول قالش اولان بعض تفرعاتی حقیقه کی مطالعات و نقاط نظرنی بسط و تمهید ایله اکتفا ایتمش اولدیغندن مطالعات واقعیه بی لایقیه آکلایه بیلک ایچون فرانسه نك شو صوک قرق سنه لك احوال تاریخچه سنه آز چوق واقف بولمقی اقتضا ایدر . اصحاب مطالعه میانده ایسه بوباده تدقیقاتی اولمیانلر ایله فرانسه زجه بیلیمیانلر بولنه بیلیمک احثانه مبنی ( فاگه ) نك یالکز ذکر یله اکتفا ایلدیکی وقوعات و حادثاته دائر ایجاب ایدن معلومات و توضیحات علی طریق التحشیه درج و علاوه قلمشدر .

ع . ولید



( قومون [ ۱ ] ) اغتشاشی - که ظنمه قالیرسه حدودی منع ایتمک اولدجه قولای ایدی - ( تیر ) ایله رفقاسنک نتیجه خطاسی اوله رق ظهوره کلشدر . ( تیر ) ایله رفقاسی و مجلس ملینک ده اکثریت عظماسی پارسک احوالندن ، پارسه لیلرک طبایعندن تامیله بی خبر بولنیور لر ایدی . بالخاصه ( تیر ) ، اوروپایی پک کوزل بیلور ، فقط فرانسه بی اوروپادن آز طانیور ، پاریسی ایسه فرانسه دن ده دها چوق آز طانیوردی . او جهته پارسه صنف عوامک عدم خوشنودیسنی

( ۱ ) « قومون » ۷۱ - ۱۸۷۰ محاربه سنده آلمانلرک پارس محاصره سنی دفع ایتملری اوزرینه ۱۸ مارت ۱۸۷۱ تاریخده تشکک ایدرک سنه مذ کوره مایسی نهایتده ، فرانسه اردوسی طرفندن پارسک ایکنجی دفعه اوله رق محاصره سنی متعاقب اورته دن قالدیریلان هیئت اختلالیه نك اسمیدر .

بو هیئت اختلالیه ، محاربه نك احداث ایتدیکی قاریشقلقدن بالاستفاده فرانسه نك احوال اجتماعیه و امور اداره سنده ، تجدیدات و انقلابات اساسیه وجوده کتیرمک هوسنه دوشمش بر طاقم افکار مفراطه اربابنک اتحادیه اورته به چیقمش و پارسه بر حکومت موقته تشکیک ایدرک و مرسانیده بولنان و ( تیر ) ی ( قوه اجرائیه ریسی ) نصب ایدن اصل حکومتی طایقندن استنکاف ایله پارسه بر چوق افعال اختلالکارانه ده بولمش ایدی . نهایت ( تیر ) و استناد کاهی ولان مجلس ملی ، پای تختی بومفرط و اغتشاشجو آدملرک الندن قورتارمق ایچون عساکر نظامیه ایله پاریسی محاصره به مجبور اولمش و آز زمان ایچنده شهر ضبط ایدلش ایسه ده ( قومون ) طاقی دوچار اولدقلری مغلوبیتدن طولایی اخذ ناز قصدیه پارسه پک چوق تخریبات ایقاع و برچوق بی کناهلری غدارانه اتلاف ایتمشدر . فقط صکره ( ورسای ) حکومتی ده کندیلرخی پک قانی صورتده تشکیل ایشدر .

تولید و تحریک ایده جک بر طاقم تدابیر اتخاذ ایلدی . بو عدم خشنودی چابوق بر اغتشاش حالی آلدی ، بو اغتشاش ده اک مخوف بر محاربه داخلیه منجر اولدی . مع مافیه حقیقت حالده بو خطا ایله آنک تولید ایلدیکی مدهش فلاکت ، نتایجی اعتباریله فائده مند اولمقدن خالی قالمدی . چونکه (تیه) ک وجودی او تاریخده فرانسه ایچون الزم ایدی ، حالبوکه (تیه) اگر (قومون) اغتشاشنی باصدیر مامش اولسه ایدی ، مجلسک اعتمادنی آتی آیدها محافظه ایده مز ، (قومون) دن بر قاج آی صکره ، یعنی ۳۱ آغستوس ۱۸۷۱ تاریخده (قوة اجرائیه رئیسکنندن) فرانسه ریاست جمهوریتی مقامنه ارتقا ایله مزیدی ، واقعا مجلسک بو اعتمادی اوزون مدتله بر شکل ترددی حاز اولمقله برابر دائمی صورتده بر طاقم مقاصد خفیه و حسابات ذاتیه ایله مزوج بولمقده ایدی ، فقط نهده اولسه ینه مجلس ملیک اعتمادی ایدی .

اوچنجی نابولیونک بو صرمده وقوع وفاتی <sup>(۱)</sup> (تیه) ک پک ایشنه یارایه رق کندیسنی تشجیع ده ایستیدسه ده ، مشارالیه جمهوریتی بر آن اول اساسکیرایتمک ، جمهوریته مخصوص قانون اساسی بی وجوده کتیرمک ایچون بیوک بر حرص پیرانه ده دوشدیکندن ، نهایت بو یوزدن سقوط ایتدی . (تیه) ک بوتشبتنی اوزمان ایچون بن نابومس و نتیجه سی مشکوک بولمق اعتباریله دائما لزومسنز اولمق اوزره تلقی ایلرم . چونکه بوکی مشکوک نتیجه تشبثات دائما داعی تهلکدر . خلاصه (تیه) بوسبیله موقعندن

۱) اوچنجی نابولیون ، معلوم اولدیی اوزره ، ۱۸۷۰ ده سیدان ده آلمانلره اسیر دوشدکدن صکره محاربه نك ختامنه قدر آلمانیا ده موقوف قالمش و مصالحه نك عقدنن صکره انکلترده (چیزلهورست) شاطوسنه چکلمش ایدی . اوراده اوچ سنه قدر متزویانه یاشادقندن صکره ۱۸۷۳ ده وفات ایلشدر . سیاسیاتک عبرت ایله باقیله جق جلوه لرندندرکه بو آدم ، اداره سزلیکی ، بصیرت سزلیکی یوزندن فرانسه بی اک بیوک فلاکتله ، نکبتله سوق ایتش ایکن ، سقوطندن صکره ده فرانسه ده برخیلی طرفدارانی قالمشیدی . حتی بو طرفداران سائر حکمدار طرفدارانه بالالتحاق فرانسه ده جمهوریتک تأسیسنه اوغراشانلرک مساعیسنی عقیم براهه جق مهم بر قوت تشکیل ایلدکلرندن ، نابولیونک وفاتی قوت و نفوذ لرینه آرزو قو ایرات خلل ایتش و بوده بالطبع جمهوریت پرورانک خیلجه ایشنه یارامشدر .

دوشدی. آنک یزینه دوق (دومال) ۱) فرانسه رئیس جمهوری تعیین ایدلدی. خلق ایسه بو انتخاب و تعینک فرقه بیله وارمدی. حالبوکه دوق (دومال) برجهله، غایت کوزل برجهله اوزرینه - که تکمیل پروغرامی احتوا ایلکده ایدی - مقام ریاسته اقامد ایدلمشدی. بوجهله شو سوزلردن عبارت ایدی: « بن مع الممنونیه بر واسطه ائتلاف اولمق ایسترم؛ فقط هیچ بروقت واسطه استعماله اولمیه جفم. » (۲) دوق (دومال) بو قولیه: « جمهوریت ایله حکمدارلق آرمسند. یعنی ایکسینک اورتسی بر طرز ادارمی قبول ایدرم؛ فقط جمهوریتدن حکمدارلغه کچمک ایچون بر واسطه اوله مام. دیمک ایستوردی. مجلسک صاغ جناح فرقه سنک هیئت اداره سی دوق (دومال) ی ایشته بو پروغرام اوزرینه انتخاب ایلشدی. دوق (دومال) یالکیز برکیجه ریاست جمهورده بولندی. ایرتسی صباح بونا یارط فرقه سنه منسوب اعضا - که بونلرک مقدارلری پک محدود اولمقله برابرینه مجلسده آرز جوق صاحب نفوذ ایدیلر. - کلوب صاغ جناح هیئت اداره سی بولهرق دوق (دومال) موقع ریاستده ایقا ایدلیکی حالدده کندیلرینک معاوضلرینه آرتق انتظار ایدلمه سی پیلدیردیلر. بونک اوزرینه دوق (دومال) دن صرف نظر ایدیلرک مارشال (ماق ماهون) انتخاب اولندی.

۱) دوق (دومال) ۱۸۴۸ ده سقوط ایدن قرال لوفی فیلیپک دردنجی اوغلی اولوب اوچنچی نابولیونک دور حکومتده بالضروره فرانسه دن خارجه امرار عمر ایش و ۱۸۷۰ محاربه سندن صکره مملکته عودتله بر خیلی خدماتده بولمش ایدی. بعده سیاسیانک تحولات متابعه سی نتیجه سی اولهرق فرانسه دن بردغه ده اخراج ایدلش ایسه ده کندیبی مملکته فرط محبت ایله متصف بولندیغندن ۱۸۸۹ ده تکرار عودته مساعدده اولمش ایدی. دوق دومال فوالعاده زنگین اولوب مشهور (شاحتی بی) شاطوسی، احتوا ایتدی بالجله آثار نفیسه ونادره ایله برابر (انسیتویه) اهدا ایش و فرانسه ده بیوک کوچک هرکسک مظهر احترامی اولدیغی حالدده ۱۸۹۷ ده وفات ایتشدر.

(۲) بوجهله نک فرانسه سی شوبله در:

« je veux bien être une transaction, je ne serai pas une transition »

( اورله آئیستلر ) ۱ ایله ( له ژیتیمیسترلر ) ۲ آره سنده بر اتفاق و اتحاد حصولنك عدم امكانی مجلس ملی بی ، ( تیه ر ) . قارشی رد ایستدیکي جمهوریت قانون اساسیسی تنظیم ایلکده ، مضطر براقدی ؛ بعده مجلس وظیفه سنه ختام ویررک طاغیدی .

آرتق قانون اساسی موجبجه ابکی مجلس ، یعنی بر مجلس مبعوثان ایله برده مجلس اعیان موجود بولغسی لازم کلمکده ایدی . مجلس ملینك ختام وظیفه سیله طاعلمه سی اوزرینه انتخاب اولسان مجلس مبعوثانك اکثریت اعضاسی جمهوریت طرفدارانندن تشکیل ایلدی . اعیانه کلنجه مجلس مذکورده ، بدایه اکثریت محافظه کارلرک النده ایدی . بو جهته اساساً محافظه کار اولان ( ماق ماهون ) ایچون مقام ریاستده قالمق ممکن بولغقمده ایدی . اوده بو طریق تر جیح ایله ریاستی محافظه ایلدی . فقط مجلس اعیانك بر موجب قانون اساسی ثلث اعضاسنك تجددیدی اوزرینه مجلس مذکورده همان تماماً جمهوریت طرفدارانندن تشکیل ایلدیکی جهته ( ماق ماهون ) ایچون آرتق مقامنی محافظه احتمالی قلمدی .

۱ ( اورله آئیست ) لر ( اورله آن ) خاندانی طرفدارانندن متشکل فرقه سیاسیه نك منسوبنه اطلاق اولنور .

فرانسه ده شمده یه قدر ( اورله آن ) نامی آلتنده درت مختلف خاندان ظهور ایتمش ایسه ده الیوم ( اورله آئیست ) تسمیه اولنان فرقه نك منسوب اولدینی سلاله اون دردنجی لوئینك برادری فیلیپ ایله باشلار . بو ( فیلیپ ) عائله سندن فرانسه ده قرالاق مقامنه شمده یه قدر یالکیز برذات کلشدرکه اوده ۱۸۳۰ ده بوربون خاندانندن قرال اوننجی ( شارل ) . خلف اولان لوئی فیلیپدر . لوئی فیلیپ معلوم اولدینی اوزره ۱۸۴۸ اختلالی اوزرینه ترك تخته مجبور اولمشدی . بو کونکی اورله آئیستلر ایسه لوئی فیلیپ احفادینك سنأ اك بیوکی اولوب الیوم فرانسه تاج و تختنه ادعای حقوق ایدن دوق دوره آنك منسوبینندن عبارتدر .

۲ ( له ژیتیمیسست ) لر کلنجه ، ( مشروع ) معناسنه اولان ( له ژیتیم ) کله سندن مشتق بو تعبیر ایله فرانسه حکمدارلغنك صاحب و وارث مشروعی عد ایدیلان بوربون خاندانی طرفدارانی یاد اولنور . بوربون خاندانی فرانسه ده دردنجی هازی ایله مقام حکمداری به قاعد اولمش و ۱۸۳۰ اختلالی اوزرینه فرانسه نی ترکه مجبور اولان اوننجی شارله قدریدی قرالیشدیرمشدرد . الیوم کرک ( اورله آئیست ) لر و کرک ( له ژیتیمیسستلر ) ، ( مونارشیسست ) یعنی ( طرفدار حکمدار ) ویا ساده جه محافظه کار نام عمومیسی آلتنده یاد و تسمیه اولنور لر .

بناءً عليه (ماق ماهون) استعفاستنی ویرهك برینه ۳۰ كانون ثانی ۱۸۷۹ ده (ژول غرهوی) رئیس جمهور تعیین قلندی . ایشته بوتاریخندن اعتباراً فرانسهده جمهوریت تاتم اولهرق تأسس ایلیه ییلش اولدی .

(تیره) ، «جمهوریت محافظه کار اولمق اقتضا ایدر ، ویاخود هیچ تأسس ایده مز» دیمشدی . حالبوکه ایشته (ژول غرهوی) نك انتخابی تاریخنندن اعتباراً جمهوریت محافظه کارلقدن تماماً عاری اولهرق تأسس ودوام ایلدی . مع مافیه (تیره) بستیونده حقسنر دکل ایدی . چونکه جمهوریت اومرتهده مهاجماته معروض بولندی . اودرجه لرده فورطنه لر کچیردیکه فوت اوله سنه رمق قالدی ، بوجوملر وفورطنه لر کنديسنی قرق سنه لك براداره دن صكره پك زیاده ضعیف دوشوردیلر و جمهوریت بوضعفی اومرته حس ایلمکده درکه ، کنديسنی دائماً تهلكیه القا ایدن ، درمانده براقان برطاقم طلبکار طرفدارانه استناد ایلمک مجبور اولمقده و بو طرفدارانندن صوكت درجهده متفقر بولمغله برابر ، صولت ومهاجمه لرندن قورقدینی جهته یینه کنديلرینه مماشات ایلمک مضطر قالمقده در .

جمهوریتسه قارشی ایلمک وقوعبولان هجوم (بولاتیزم) اولمشدی .

(۱) (بولاتیزم) فرانسهده ایکی دفعه حریبه نظارتی احراز ایلش اولان جنرال (بولاتزه) نك نامه نسبتله تشکل ایدن فرقهك اسیدر .

جنرال (بولاتزه) ۱۸۲۷ ده تولد ایلش اولوب فرانسه مکتب حریبه سندن نشأت ابتدکدن صكره جزایر ، ایتالیا ، هند چینی ، آلمانیا محاربه لرده یارداقلر کوستروب سلسله مراتب عسکریده سریع خطوه لرله ایلرلیبهرك هنوز قرق بدی یاشنده ایکن فریقلاق پایه سنه قدر ارتقا ایلش و ۱۸۸۶ سنه سنده سوق سیاسیات ایله حریبه ناظری اولمشدی . نظارتی مدننده اتخاذ ایلدیکی برطاقم مقررات اداره و سیاسیه ایله بیوک بر شهرت اقتدار قازاغش وحتی آلمانیا ایله فرانسه آرمسنده ۱۸۸۷ سنه سنده ظهور ایدن بر حدود حادثه سنندهده آلمانیا به قارشی غایت وطنپرورانه و متاشکارانه بر طور التزام ایلدیکی شایع اولقله بوده شهرتی حد غایبه ایصال ایدرك کنديسنك (اخذمار جنرالی) عنوانیه تسمیه سنه سببیت ویرمشدی . جنرال بولاتزه بوندن صكره اکتساب ایلدیکی شهرته گوگنهرك برطاقم خودسرانه حرکاته متصدی اولدیغندن نقاعد ابدلك صورتیه سلك عسکریه دن اخراج ایدلش ایسهده بوندیر کندوسنك مبعوث انتخاب ایدلسی امکانشی حصوله کتیردیکنندن جنرال بوندن بالاستفاده بستیون سیاسیات عالنه آتیلمشدر . بعده برقاچ ایالتده و یاراسده بر آنده نامزدلکینی وضع ایدرك غایت عظیم بر اکثریتله مبعوث انتخاب ایدلش و غایه ومقصدی ایسه مملکتده کی

(بولانژیرم) حد ذاته تراکم اتمش بر جوق عدم خشنودیلرک بغته بر آرمه کلوب برلشمسندن حصول بولمش بر مسئله و خصوصیه (پاناما) قنالی یغما کر لکنه ۱) قارشی بر حرکت قیامیه ایدی . ده موقراسی اوزرینه مؤسس بالمله جمهوریتلرده اولدینی کبی فرانسه ده ، مصارف انتخابیه آلتنه زبون و تخصیصاتلری دون بر طاقم

کشمکش اداره به بر نهایت و بر مکدن عبارت بولندینی اعلان اتمش اولدیندن ، فرانسه ده او زمان بر طاقم آج و طفیلی مبعوثلرک و آلرله منسوب اولانلرک الجای حرص و طمعه ایقاع ایله کلری بر جوق سؤاستعمالدن بیزار قالان خلق و برده جمهوریتک دشمنی اوله رق ، بولانیق صوده بالقی آولامق سوداسنده اولان فرق مخالفه نك اتحادیه بی نهایت طرفداران جمعنه موفقی اولمشدی . اگر جنرال بولانژه ایسته مش اولسه ایدی و یا دها طوغریسی موسیو فاکه نك سویلدیکی وجهله عزم و متانت صاحبی مقتدر و ماهر بر آدم اولسه ایدی خلک اکثریت عظماسنک اوزمانکی نمایانته نظراً فرانسه ده بهمه حال بر انقلاب اداره وجوده کتیره رک جمهورینی لغو ایدر و ایستدیکی شکل حکومتی مملکته قبول ایندیره بیلیردی . فقط کندیس حقیقت حالده بوکبی امور معظمه بی سوق و اداره افتدارندن قطعاً محروم بولندینی جهله متوایسته سدچمک ایستیان جمهوریت طرفدارنك بر قاچ تدبیر مصیبانه و ماهرانه سیله فرانسه دن فراره مجبور اولمش وانکلمترده وسائر برلرده بر آرز طولاشدقدن صکره نهایت بلجقاده اختیار اقامت ایدرک اوراده معشوقه سنک وفاتی اوزرینه ۱۸۹۱ ده آلمک مزاری اوستنده اتخار ایشدر .

۱) (پاناما) مسئله سی ، یدی یوز ملیونی متجاوز بر سرمایه ایله ۱۸۸۸ تاربخنده پاناما قنالی کشاد اتمک ایچون شکل ایدن قومپانیاده وقوعه کتیریلان سوءاستعمالات و ارتکابات اوزرینه ظهور ایشدر . بو مسئله فوق العاده قاریشیق اولوب فرانسه ده عظیم قیل و قالی موجب اولمش ، قومپانیه نك سوءاستعمالاتی کیزلیه بیلیمک ایچون حکومتدن بعض مساعدات استحصالی ضمننده بر جوق مبعوثان واعیان رشوت اعطا ایلدیکی ادعا ایدلش و سؤیش قنالی کشاده ایدن موسیو (فردیناد دوله سپس) و نامنه نسبت ایدیلان قله نك بایسی موسیو (ایغل) کبی قومپانیه نك مدیر و یا مهندسی اولان صاحب نام و شهرت کیمسه لر بشر ، اوچر سنه حبسه بیله محکوم ایدلمشدی . بو حکم محکمه تمیزجه مرور زمان بولندینی ادعاسیله نقض ایدلش ایسه ده قومپانیه نك ، میلیونلره سرمایه سی رجال سیاسیهدن و مبعوثاندن صاحب نفوذ اولانلره ، غزنه جیلره رشوت اوله رق توزیع ایلدیکی ثبوت بولدیندن کرک موسیو (لهمه سپس) کرک موسیو (ایغل) معناً محکوم اولقدن قورتلامش و بو ارتکابات اشتراک ایندیکی بالاخره قطعاً تبیین ایدن برخیلی رجال سیاسی ایله حتی نظاردن (بایو) بیله حبسه محکوم اولمشلردر . بو مسئله یالکیز فرانسه نك دور حاضر تاربخینده دکل بلکه تاریخ عالمده امثالنه نادر تصادف ایدیلان طولاندریچقلر جله سندن اوله رق ، غایت مدید و مشوش دعاوی به سببیت و برمش ، سنه لرجه سوروتوب طورمش و فرانسه ده جمهوریت اداره نك جدی صورنده شایبه دار اولسنی انتاج ایشدر .

محتاجین مبعوثان باناما قنالی قومپانیه سینک میلیونلری اوزرینه شتابان اوله رق ، مذکور قومپانیه ایفا و یا وعد ایلدکری معاونت مقابلنده بول بول باره لر آلمشردی . ایشه ( بولاترزم ) ، هنوز بوکی سو استعمالاته آلیشمامش اولان برقم خلقت بر حدت بر حرکت قیامیه سی ایدی . عینله بر عصر مقدم افکار عمومیه ده ( دیرکتوار ) ۱ . قارشی وقوع بولان میلانه مشابه ایدی .

( مابعدی کله جک نسخه ده )



۱ [ دیرکتوار، فرانسه اختلال کبیری زماننده ( قونوانسیون ) مجلسینک یرینه قائم اولان طرز اداره حکومت اولوب ۱۷۹۵ سنه-نده تأسس ایله رهك بدایه اداره امورده برخیلی موفقیتلر کوسترمش ایسه ده بالاخره يك زیاده کوشه یه رك داخل و خارجا معروض قالدینی مشکلات قارشوسنده تامیله اظهار عجز ایلدیکندن عموم فرانسه نظرنده هر درلو نفوذ واهمیتی غائب ایتمش و بوناپارت، مصردن عودتنده ( دیرکتوار ) ك بوضعندن بالاستفاده اداره مذکوره بی لغوایله ۱۷۹۹ ده یرینه ( قونسول ) اداره سنی اقامه ایتشد .